



# SUMM, SUMM, STUMM

oder: Wo isch dr Willi?

*Summ, Immeli, summ  
Isch s um Dy umme stumm  
Waisch, De bisch im Jenssyts glandet  
Eländ in Dym Giftmues gstrandet  
Summ, Immeli, summ  
Bisich au Du gly stumm*

Es schreyt und däubelet dr Schaaggi  
S haig zwische Stärnfrucht und dr Kaki  
Kai Äärbeer me – an sällem Morge  
S isch bleed, will är doch umsverworge  
By syyne Gescht hyt z Oobe glänze  
Und numme Exklusivs greedänze  
Sy Entschaid isch drum schnäll gfasst  
Schnoorz, eb s grad zer Saison basst  
Im Konsi merggt är in sym Wahn:  
«Vo dr Naduur han ych kai Blaani!»

Wo s Züüg häärkunnt, isch alle glyych  
Dr Schaaggi isch wie Du und ych  
S spyylt – ehrlich gsait – kai Rolle meh  
Was wenn duesch uff Dym Däller gsee  
Vo allem het s, sunscht gäabt s Verdruss  
E Fueterbärg im Yberfluss  
Profit isch wichtig, rund um d Uhr  
Drum sorgt au Mono als Kultur  
Ass d Ärnti letschtlig nid in d Hoose  
Goot – duesch greffdig Gift verbloose  
Und s Pestiziid brätscht naimeduure  
Em Immeli diräggt in d Schnuure

Es styggt derby em Buur sy Lohn  
Dr Bund zahlt ihm no Subvenzioon  
Spritzt s Gift all Daag uff Raps und Waize  
S zellt numme n ains: Muesch s Gschäft aahaize  
Syngenta, Bayer und Konsorte  
Dien s gifterlööste Gäld denn horte  
Monsanto isch die greeschti Numm're  
Fir Peschtiziid – au uff d Guggumm're  
Bym Schäädling und au Nutzdier jaage  
Goot s primäär dr Naduur an Graage  
Fir s Immeli, s isch ganz perfid  
Duet s Neonikotinoid  
Diräggt an d Hirnizälle go  
So weiss es nimm, wohäär s isch ko  
Kai Orientierig, Pfuus blyybt wägg  
S zuggt no n e letscht Mool deert im Drägg  
Sy Immetstogg duet s nimmi gsee  
S verliert dr Kampf – s duet bald nimm weh

Dr Mensch schiggt letschtlig ohni Noot  
Sy wichtigscht Nutzdier ab in Doot  
In uns'rem Land, so vyyl schyynt glaar  
Wird s Immeli als Spezies rar  
Und au in andere Regioone  
Däät s, im Verdraue, wirgglig lohne  
D Befruchtig vo dr Pflanzewält  
Numme wääg em Bligg uff s Gäld  
Mit Wandervelgger leese z welle  
Wo ainzig dr Profit duet zelle  
Dä Wääg schlyycht s Beese mit ins Land  
Als Parasit het s in dr Hand  
D Varoamilbe uss Färnoscht  
Gseet s Immlibluet als Erschtklasskoscht  
Und duet derby, s sell niemer glaage  
Au grad e Virus yberdraage  
Wo s Immeli nid sell verletze  
Vyylmeh vo inne häär zersetze  
Dr Gwinn vom Imber schiesst dur d Deggi  
Und s Immeli blyybt uff dr Streggi

Eb Varoose, Pestiziid  
S isch baides – bref – e Genoziid  
Drum het dr Einstein Albi rächt  
Wo sait, es goot dr Menschhait schlächt  
Duet s Immlivolgg e Mool verstumme  
Kai Maya und kai Willi umme  
S Ändi vo dr groossen Ära  
Aadie, Apis mellifera!  
Und mangels Immlibluet derno  
Scho gly dr Homo Sapiens go

*Summ, Immeli, summ  
Isch um Dy umme stumm  
Waisch, De bisch im Jenssyts glandet  
Eländ in Dym Giftmues gstrandet  
Summ, Immeli, ...  
... stumm*

D Ladärnen-Usschdellig isch vom Mändig z Nacht (19. Hornig) bis am Mitwuhe de Moorge (21. Hornig) uff em Minscherplatz. Dert ka men ybrigens au alli Zeedel und Schnitzelbängg, d Blaggede und dr Rädabäng kaufe. Mer fraien ys uff Ihre Bsuech.

D Basler Fasnacht im Internet: [www.fasnacht.ch](http://www.fasnacht.ch) | [www.iggs.ch](http://www.iggs.ch)

Drugg: Schwabe AG Muttenz